

## **Sebelum umum kabinet, Muhyiddin bertemu MP di Putrajaya**

**Malaysiakini**

**09 Mac 2020**

Perdana Menteri Muhyiddin Yassin hari ini mengadakan pertemuan bersama ahli-ahli Parlimen di Seri Perdana di Putrajaya, sebelum mengumumkan barisan kabinet baru.

Kenderaan yang membawa Muhyiddin dilihat memasuki kediaman rasmi perdana menteri itu pada kira-kira 3 petang, dan sebelum itu kenderaan yang membawa ahli-ahli parlimen tiba secara berperingkat.

Antara ahli parlimen Barisan Nasional (BN) yang kelihatan ialah Ahli Parlimen Bagan Datoh Ahmad Zahid Hamidi yang juga presiden Umno serta Naib Presidennya Ismail Sabri Yaakob yang juga ahli parlimen Bera.

Ahli Parlimen BN yang lain yang turut kelihatan ialah Khairy Jamaluddin (Rembau), Mohamed Nazri Aziz (Padang Rengas) serta Ahli Parlimen Tapah M Saravanan dan Ahli Parlimen Ayer Hitam Wee Ka Siong, masing-masing daripada MIC dan MCA.

Turut kelihatan bekas Timbalan Presiden PKR yang juga Ahli Parlimen Gombak Mohamed Azmin Ali dan Ahli Parlimen Ampang Zuraida Kamarudin.

Ahli Parlimen Tambun daripada Parti Pribumi Bersatu Malaysia (Bersatu) Faizal Azumu juga dilihat tiba untuk menghadiri pertemuan itu.

Turut hadir beberapa pemimpin PAS, diketuai Presidennya yang juga Ahli Parlimen Marang Abdul Hadi Awang, Ahli Parlimen Pasir Puteh Dr Nik Muhammad Zawawi Salleh dan Ahli Parlimen Kota Bharu Takiyuddin Hassan.

Muhyiddin dijadual mengumumkan barisan kabinet di Perdana Putra pada 5 petang ini.

Pada 11 pagi, Muhyiddin menghadap Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah untuk mempersembahkan senarai barisan Kabinet.

**Copyright © 1999-2012 Mkini Dotcom Sdn. Bhd**

Source: <https://www.malaysiakini.com/news/513901>